

Hallo Schatz

SUSI ROTHMUND/FMR

Para spetga la rihezia anetga sin mei ed atgnamein stuess jeu gnanc luvrar pli. Jeu scrivel denton bugen e perquei pudeis vus leger oz quella glossa. Da temps en temps dun jeu in'egliada egl ordinatur da «junk-e-mail», ei vegn numnadamein magari avon, ch'in ni l'auter e-mail d'impurtonza setschenta en quei caum. Era quella ga anflel jeu leu in mail che vul far endamen ina conferenza da pressa e da reservar il termin. La pli gronda part da quei che setschenta sut «junk e-mail» ei denton miarda cun links plein virus e sai buca tgei. Il meglier eis ei da gnanc leger e gie buca cliccar sin in link!

Gnanc sch'ei carmalan sco quels da «Apfelkiste» cun slogans sco stylisch tras la stad. Igl ei sowieso memia tard, ussa ch'ei fa plaunet atun. En in auter e-mail damonda il medem speditur: «Bereit für Deine Hochzeit? Rothmund.» Hm, na – e co vegn quel pomai sin l'idea ch'jeu lessi maridar? Lu damonda el sch'jeu lessi che las nozzas daventien in eveniment singular ni la party da mia veta...ed aschia vinavon. Gie, encunter la party dalla veta hai jeu nuot – denton na, jeu smachel ussa tuttina buc sin quei link.

In auter speditur emprova cun «Hallo Schatz» e cuntinua cun «wir grüssen euch im Namen des Herrn». Jeu seigi elegida per in project da beneficenza, in project che hagi la finamira da – citat: «Leben zu berühren und denen zu helfen, die wir auf der ganzen Welt können, wie Gott uns gesegnet hat.» Schon in miserabel tudestg, mo la finfinala ha quei speditur gudignau avon dus onns in jackpot da 168,5 milliuns US-dollars ed ei sedecidius voluntariamein da regalar quella summa per far bunas ovras. Perquei survegnel era jeu in messadi e sun ina dallas ventireivlas persunas che survegn 2 milliuns euros – ei drova mo in clic.

Plinengiu scriva el gest sez tgei che quels daners fan cun mei: «Diese Spende wird an Sie ausgezahlt, um Ihnen zu ermöglichen, Ihre Probleme zu stärken, und um uns vor allem dabei zu helfen, uns großzügig zu helfen, den weniger privilegierten, Waisen- und Wohltätigkeitsorganisationen in Ihrer Nähe die Hand zu reichen.» Ihre Probleme zu stärken? Na engraziel! Cheu ha la maschina da translaziun pari fatg in bien survetsch. Il link dils milliuns laschel pia era star – hallo Schatz vi ni neu.

Era «Sheryll Goedert» vul exnum parter cun mei ses 396,9 milliuns US-dollars ch'ella ha gudignau. 3,5 milliuns euros – 1,5 milliuns dapli ch'il Schatz vul ella regalar a mi. Ina milliseconda vegnel bunamein en empruament da cliccar sin siu link – mo, na, meglier schar star era quel. Lu suonda in e-mail d'ina dunna che vul raquintar a mi la historia da sia veta e co ella ha salvau siu um dalla butteglia: «Ich rettete meinem Mann vor Trunksucht für einen Monat.» Mah, sch'ei gida mo per in meins sche lu – splunta enzanua auter cun tia offerta.

«Ralf Schleich» fa tutta honor a siu num e ruschna bunamein dil tg... viaden. El spera ch'ei mondi bein cun mei e pren la bucca bravamein pleina: «Ich bin ein Typ, der mal in deiner Haut war und den Mut finden musste, etwas dagegen zu unternehmen. Die Sache ist, das Leben ändert sich nie, wenn man es zulässt.»

Sa co quei ei atgnamein propi manegiau? Sai ussa buca sch'jeu duess rir ni scriver anavos e dumandar tgei che ha lu buca plaschiu ad el ch'el ha puspei stuiu seslutar ord mia pial.

Ellas proximas lingias anflel denton la soluziun. Jeu havevel buc avunda daners per signur Schleich. En siu video (il link ei secapescha aschuntaus) declara el co ins vegn tier success e po aschia midar la veta. Lu scriva el denton: «Ich bin mir sicher, dass Sie gerade nicht zufrieden mit Ihrem Leben sind und ich auch nicht.» Hm, ei Schleich ussa buca cuntents cun mia ni cun sia veta? Per vegnir aschia in denter gl'auter drovel buca siu cussegl gnanc sch'el admonescha: «...es wird immer schlimmer, wenn du nichts dagegen unternimmst.» Bien, sche lu fetschel ussa enzatgei encunter l'entira miseria. Quei clic empermettent gida segir. En patratgs salidel il Schatz, il Schleich e la Sheryll – cliccond e svidond igl ordinatur da «junk-e-mail».

Tgei ei quei propi, in «junk e-mail»?

Eugen Monn dalla Edecom SA a Trun explica: «Aschinumnai «junk e-mails» ein novitads electronicas nungiavischadas ch'ins survegn sil computer e notebook. Sco il num di, arrivann talas novitads per regla culla posta electronica, pia en fuorma dad e-mail. «Junk» san ins translatar sco «rumien», vul dir ch'ei setracta da messadis ch'ins duess buc arver ed era buca dar risposta sin tals. Biars systems da luvrar sin e-mails sorteschann la posta electronica gia dalla bial'entschatta e svieschan quels e-mails problematicas en in caum cul num «Junk-E-Mail» ni «Spam». Aschia simplifichescha ei agl utilisader d'haver la survesta da tals e-mails. Ei sa denton era esser ch'in e-mail – ch'ei buca rumien – vegn classificaus sco «Junk/rumien» e vegn ord quei motiv sviaus en quei ordinatur «Junk-E-Mail». Ils motivs san esser il cuntegn d'igl e-mail, l'adressa da e-mail dil speditur ni negin text sut «Betreff». Aschia fa ei senn da controllar da temps en temps la posta ch'ei egl ordinatur «Junk-E-Mail». Suenter haver controllau ils detagls d'igl e-mail sco per exemel l'adressa dil speditur, il text che quel ha scret e tier dubis haver sclariu ei cul speditur al telefon, san ins – sche tut ei bien - stuschar quel el caum «Posteingang» e lu arver igl e-mail. Sch'ins ei buca segirs, lu pli bugen ina ga buc arver in e-mail enstagl d'arver in ch'infettescha igl entir sistem e caschuna donns. Era sch'il program dad Antivirus ed autras mesiras encunter talas attaccas ein avon maun, ei il saun giudezi digl utilisader adina dumandaus.»